

Evening Dogri (NSD) Bulletin 14-11-2024

आकाशवाणी

खास खास खबरां

1. राष्ट्रपति द्रौपदी मुर्मू होर अज्ज रातीं 8 बजे जनजातीय गौरव दिवस दी पूर्व संजा राष्ट्र दे नां संदेश देंगन।
2. प्रधानमंत्री नरेन्द्र मोदी होर जनजातीय गौरव दिवस ते भगवान बिरसा मुंडा हुंदी 150मीं जयंति आले समारोहें दे शुभारंभ पर कल बिहार दे जमुई जांगन।
3. प्रधानमंत्री होरें आखेआ ऐ जे महाराष्ट्र गी विकसित भारत दी दिशा च देसै दी अगुवाई करनी लोड़चदी ऐ। उनें आखेआ जे इस नजरियै मूजब ऐलै महाराष्ट्र च केई बड्डी परियोजनां चलाइयां जा'रदियां न।
4. नमीं दिल्ली दे भारत मंडपम च अज्जै थमां 43मां भारती अंतर्राष्ट्रीय बपार मेला शुरू-उद्योग ते बपार मंत्री पीयूष गोयल होरें 14 दिनें दे इस मेले दा उदघाटन कीता।
5. केन्द्री मंत्री डॉ. जितेन्द्र सिंह होरें आखेआ ऐ जे कर्मयोगी सप्ताह दा नतीजा बड़ा खरा रेआ ऐ ते इन्नै मुख्य भरै च कर्मयोगिएं गी समर्थ निर्माण ते लगातार सिक्खने दी भावना कन्नै जोड़ेआ ऐ।

<><><><><><>

President

राष्ट्रपति द्रौपदी मुर्मू होर अज्ज रातीं 8 बजे जनजातीय गौरव दिवस दे पूर्व संजा पर राष्ट्र दे नां संदेश देंगन। आकाशवाणी दिल्ली आस्सेआ राष्ट्रपति हुंदे संदेश दा प्रसारण इंद्रप्रस्थ, आकाशवाणी, लाईव न्यूज़ 24 इनटू 7, एफएम गोल्ड ते एफएम रेनबो चैनलें पर कीता जाग। भगवान बिरसा मुंडा हुंदी जयंति पर कल

मुख्य च जनजातीय गौरव दिवस मनाया जाग। इस दिनै दे इतिहास ते संस्कृति च जनजातीय समुदाय दे योगदान गी चेता कीती जंदा ऐ। राष्ट्रपति हुंदे संदेस दा परतियै प्रसारण कल बउलै 8 बज्जियै 45 मिनटें पर ते संजा साढे 5 बजे सब्बनें प्राइमरी चैनलें, स्थानी रेडियो स्टेशनें, एफएम गोल्ड दे सब्बने चैनलें ते एफएम रेनबो नेटवर्क पर बह कीता जाग।

<><><><><><>

PM Janjatiya

प्रधानमंत्री नरेन्द्र मोदी होर जनजाती गौरव दिवस ते भगवान बिरसा मुंडा हुंदी 150मीं जयंती दे समारोहें दे शुभारंभ दे मौके पर कल बिहार दे जमुई जाउन। प्रधानमंत्री होर भगवान बिरसा मुंडा हुंदे सम्मान च इक यादगारी सिक्का ते डाक टिकट जारी करउन। ओह ग्रामीण ते दूर-दरेडे इलाकें च जनजाती समुदास दे विकास लेई 6 ज्हार 640 करोड़ रुपें शा मते दी विकास परियोजनाएं दा उद्घाटन करउन ते केई परियोजनाएं दा नीह पत्थर बी रक्खउन। श्री मोदी होर प्रधानमंत्री जनजाति आदिवासी न्यास महाअभियान तैहत बनाए गेदे 11 ज्हार मकानें दे गृह प्रवेश च बी शामिल होउन। प्रधानमंत्री होर जनजातीय इलाकें च सेहत दिक्खभाल बधाने लेई आदिवासी न्यास महाअभियान तैहत 23 गश्ती मेडिकल यूनिट, धरती आबा जनजातीय ग्राम उत्कर्ष अभियान दे तैहत 30 बादू गश्ती मेडिकल यूनिटें, 300 वन धन विकास केंद्रें ते जनजाती विद्यार्थिं लेई 10 एकलव्य मॉडल रिहायशी स्कूलें दा बी उद्घाटन करउन। एहदे अलावा इस मौके पर जम्मू-कश्मीर दे श्रीनगर ते सिक्कम दे गंगटोक च द'ऊं जनजाती शोध संस्थानें दा बी उद्घाटन कीता जाहग। प्रधानमंत्री होर आदिवासी इलाकें च संपर्क च सुधार लेई 500 किलोमीटर लम्मी सिड़कें ते प्रधानमंत्री जनजाती आदिवासी न्यास महाअभियान तैहत 100 बहुउद्देश्यी केंद्रें दी बी नीह पत्थर रक्खउन।

<><><><><><>

VP Pushkar Visit

उपराष्ट्रपति जगदीप धनखड़ होरें आखेआ ऐ जे कोई बी इस मुल्ख च करसानें गी बंड्डी नेई सकदा ते करसानें बशकार एकता, राष्ट्रवाद लेई सब्बनें शा खरी ऐ। धनखड़ होर अज्ज अजमेर दे नेड़े पुष्कर थाहर 105में राष्ट्री जाट कन्वेशन गी संबोधित करै करदे हे। उनें करसानें गी गुजारिश कीती जे ओह नौजवानें अंदर नैतिक मुल्लें—कदरें दी समझ पैदा करन ते उनें'गी स्हेई बत्त दस्सन। श्री धनखड़ होरें पुष्कर दे दौरे दरान ब्रह्मा मंदर ते जाट शिव मंदरै च बी मत्था टेकेया।

<><><><><><><>

Mizoram DoNER Minister

पूर्वोत्तर खित्ते दे विकास सरबंधी केन्द्री मंत्री ज्योतिरादित्य सिंधिया होरें आखेआ ऐ जे प्रधानमंत्री नरेन्द्र मोदी हुंदी अगुवाई तैहत पिच्छले इक दहाके दरान पूर्वोत्तर खित्ते नै जबरदस्त विकास दिक्खेआ ऐ। अज्ज आईजोल च मीडिया कर्मिएं कन्नै गल्ल करदे होई मंत्री होरें आखेआ जे एनडीए सरकार दा मकसद, पूर्वोत्तर खित्ते गी भारती अर्थबवस्था दा विकास इंजन बनाना ऐ। उनें आखेआ जे पूर्वोत्तर खित्ते गी भारत दी विकास जात्तरा च बड़ी महत्वपूर्ण भूमिका निभानी होग। उनें इब्बी आखेआ जे अज्ज पूर्वोत्तर दे खित्ते च 17 ब्हाई अड्डे न ते नेड़मे भविक्ख च इस खित्ते दे सब्बै राज्य रेल राहें मुल्खै दे बाकी हिस्सें कन्नै जुड़ी जाडन।

<><><><><><><>

Maharashtra Viksit Bharat (updated)

प्रधानमंत्री नरेन्द्र मोदी होरें आखेआ ऐ जे महाराष्ट्र गी 'विकसित भारत' दी दिशा च देशै दी अगुवाई करनी लोड़चदी ऐ। उनें आखेआ जे इस नजरिये मूजब मजूदा समें च राज्य च केई आधुनिक बुनियादी ढांचागत परियोजनां चलै करदिआं न।

मराठवाड़ा दे छत्रपति संभाजीनगर जिले च इक चुनावी रैली अगगे भाषण दिंदे होईं उनें आखेआ जे इस इलाके लेईं 70 ज्हार करोड रुपें दी रकम दी रास-पूजी दे समझौते पर दस्तख्त कीते गे न। श्री मोदी होरें आखेआ जे मराठवाड़ा च 45 ज्हार करोड रुपें शा मते दी लागत दिआं परियोजनां पैहले थमां चलै करदिआं न। उपमुख्यमंत्री ते राष्ट्रवादी कांग्रेस पार्टी दे नेता अजित पवार होरें डिनडोरी च रैली गी संबोधित कीता। दुई बक्खी कांग्रेस अध्यक्ष मल्लिकार्जुन खरगे होरें इगतपुरी च चुनावी रैली कीती ते साबका प्रधानमंत्री पंडित जवाहरलाल नेहरू हुंदे आसेआ शुरु कीती गेदी बक्ख-बक्ख बुनियादी ढांचागत परियोजनाएं पर लोड पाई ते उनें'गी भारत दे विकास दी बुनियाद करार दित्ता। श्री खरगे होरें भारत दे विकास दी नीह रक्खने दा श्रेय पंडित नेहरू होरें'गी दित्ता। उनें आखेआ जे साबका प्रधानमंत्री सुरगवासी इंदिरा गांधी ते राजीव गांधी होरें देशै लेईं अपनी जिंदु दा बलिदान देईं दित्ता। खरगे होरें प्रधानमंत्री मोदी ते भारती जनता पार्टी पर महाराष्ट्र दे लोकें कन्नै झूठे वायदे करने दा आरोप लाया।



PM Visit

प्रधानमंत्री नरेन्द्र मोदी होर अत्तरुं शनिवार थमां नाइजीरिया, ब्राजील ते गुआना दे 6एं दिने दे दौरे पर जा'रदे न। इस बारे जानकारी विदेश सचिव विक्रम मिसरी होरें कल नमीं दिल्ली च दित्ती। उनें दस्सेआ जे इस म्हीने दी 18 ते 19 तरीक गी ओह ब्राजील च 19में जी-20 शिखर सम्मेलन च हिससा लैंगन। उनें दस्सेआ जे 2014 ते 2019 दे बाद हुन मोदी हुंदा ब्राजील दा एह त्रीआ दौरा होग। शिखर सम्मेलन दरान प्रधानमंत्री होर केइं कुलसंसारी मुद्दें पर भारत दा पक्ख रक्खगंन। जी-20 शिखर सम्मेलन दे बाहरे मोदी होर केईं लीडरें कन्नै दपक्खी बैठक बी लांगन। 16 ते 17 तरीक गी प्रधानमंत्री मोदी नाइजीरिया दे राष्ट्रपति बोला अहमद तिनुबू हुंदे साद्दे पर उत्थें महमान होंगन। तोआईं 19 कोला 21 लवम्बर तोड़ी ओ गुआना दे दोरे पर होंगन। जित्थें उत्थूं दे राष्ट्रपति मोहम्मद इरफान अली होरें उनें'गी चेचे तौरा पर साद्दा दित्ते दा ऐ।



PM-Homage

प्रधानमंत्री नरेन्द्र मोदी होरें अज्ज साबका प्रधानमंत्री पंडित जवाहरलाल नेहरू होरें गी उंदे जन्म दिन दे मौके पर चेता करदे होई उनेंगी सोशल मीडिया पर श्रद्धांजलि भेंट कीती ऐ। पंडित नेहरू हुंदा जन्म 14 नवम्बर 1889 गी प्रयागराज च होआ हा। 1947 च देश दे अजाद होने पर ओह मुल्खे दे पैहले प्रधानमंत्री बने हे।



Dominica-PM Modi

डोमिनिका नै प्रधानमंत्री नरेन्द्र मोदी होरें गी अपने सब्बने शा बड्डे राष्ट्रीय सम्मान कन्ने अधिकृत करने दी घोषणा कीती ऐ। ग्याना च कैरिबियाई समुदाय ते सांसा गजार शिखर सम्मेलन च इस बारे घोषणा कीती गई ऐ। कोविड महामारी दे दरान डोमिनिका गी राहत उपलब्ध कराने ते दौनें मुखे दी सांझ-भ्याली गी निर्गगर बनाने च योगदान लेई प्रधानमंत्री मोदी होरें गी डोमिनिका अवार्ड ऑफ ऑनर कन्ने सम्मानित करने दा फैसला लैता गेआ ऐ।



COP-29-GABV

अजर बैजान दे बाकू च संयुक्त राष्ट्र जलवायु परिवर्तन सम्मेलन दे तैहत ग्लोबल एलायंस फॉर बैकिंग ऑन कैल्यूज नै घोषणा कीती ऐ ते एहदे 25 मिनबर बैक जीवाश्म ईधन अप्रसार संधि दा समर्थन कीता ऐ एह संधि कोयला, तेल ते गैस दिए नमिं परियोजनाएं दा विस्तार रोकने दी कुलसंसारी योजना दी पेशकश करदी ऐ। जीवाश्म ईधन अप्रसार संधि दा समर्थन करियै इनें 5 बैंके माली क्षेत्र

थमां जलवायु परिवर्तन दे खलाफ आर्थिक कारवाई दा आग्राह कीता ऐ। 2009 ब'रे च इस कुलसंसारी गठबंधन दी स्थापना कीती गई ही। एह 70 बैंकें दा नेटवर्क ऐ जेहड़ा दुनिया दे हर प्रमुख क्षेत्र च कम्म करदा ऐ। सामूहिक तौर पर एह बैंक 17 अरब डॉलर दा प्रबंधन करदे न ते पूरी दुनिया च 1 करोड़ 1 लख कोला मते लोकें गी सेवा उपलब्ध करांदे न। जलवायु संकट दा मकाबला करने लेई अमीर मुखें थमां पैहा उपलब्ध कराने दी अपील दे चलदे कोई 2 सौ देशें दे प्रतिनिधि, बपार, जंगल दे प्रमुख, जलवायु वैज्ञानिक पत्रकार ते होर दुए माहिर ते हितधारक, 22 नवम्बर तोड़ी चलने आले इस सम्मेलन हिस्सा होंगन।

<><><><><><>

Delhi Pollution

दिल्ली-एनसीआर च अज्ज त्रीए पैहर ब्हाऊ दी गुणवत्ता सरबन्धी सूचकांक 424 पर पुजजी गेआ ते केन्द्र प्रदूषण नियंत्रण बोर्ड थमां हासल आंकड़े मूजब शैहरा दे किश हिस्सें च ब्हाऊ दी गुणवत्ता दी स्थिति सब्बने शा खराब रेही। आनंद बिहार च ब्हाऊ दी गुणवत्ता दा सूचकांक 459, अशोक बिहार च 461, बवाना च 449, आई.टी.ओ च 412, रोहिणी च 450, जहांगीरपुरी च 458, विवके बिहार च 454 ते पंजाबी बाग च 459 दर्ज कीता गेआ। दिल्ली च बघदे प्रदूषण दे स्तर गी दिक्खदे होई दिल्ली दे पर्यावरण मंत्री गोपाल राय होरें अज्ज नमीं दिल्ली च इक जायजा बैठक सद्दी। इस दरान उनें गुजारश कीती जे केन्द्र सरकार गी शैहीर च ब्हाऊ दी खराब हुंदी गुणवत्ता कन्नै निबड़ने लेई दिल्ली सरकार कन्नै मिलियै सांझी कार्य योजना तैआर करनी लोड़चदी ऐ। उनें दस्सेआस जे शेहरा च फिलहाल ग्रैप-3 दिनां बंदिशां लागू नेई होंगन।

<><><><><><>

IITF-Inauguration

उद्योग ते बपार मंत्री पीयूश गोयल होरें अज्ज नमीं दिल्ली दे भारत मंडपम च 43में भारत अंतराष्ट्रीय बपार मेले आईआईटीएफ दा उद्घाटन कीता। इस मेले च कोयला ते खान मंत्री जी.किशन रेड्डी होरें खान मंत्रालय दे पंडाल दा उद्घाटन कीता। आकाशवाणी समाचारे कन्नै गल्लबात करदे होई आईटीपीओ दे महाप्रबंधक शंकर नंद भारती होरें आखेआ जे इस ब'रे दे मेले दा विषय विकसित भारत एट 2024 पर आधारित ऐ। उनें आखेआ जे इस ब'रे झारखंड पर विशेष ध्यान केन्द्रत कीता जाग ते उत्तर प्रदेश ते बिहार ऐकती भ्याल राज्य दे तौरा पर एह्दे नै जुड़े दे न। साढ़े संवाददाता नै खबर दित्ती ऐ जे 14 दिनें तोड़ी चलने आले इस कार्यक्रम च बक्ख-बक्ख देश हिस्सा लेंगन। इंदे च चीन, मिस्र, ईरान, दक्खन कोरिया, थाईलैंड, तुर्किए ते संयुक्त अरब अमिरात शामिल न। एह मेला अज्जै थमां 5एं दिनें तोड़ी बपारिएं लेई खुल्ला रौहग।

<><><><><><>

Karmayogi Saptah

अमले, सार्वजनिक शकैते ते पेंशनें सरबंधी मामलें दे केन्द्री राज्य मंत्री डॉ. जितेंद्र सिंह होरें आखेआ ऐ जे कर्मयोगी सप्ताह दा नतीजा बड़ा खरा रेहा ऐ ते इसनै मुख्य भरै च कर्मयोगियें गी समर्थ निर्माण ते लगातार सिक्खदे रौहने दी भावना कन्नै जोड़ेआ ऐ। डॉ. सिंह होरें अज्ज नमीं दिल्ली च कर्मयोगी सप्ताह दे समापन समारोह गी संबोधित करदे होई आखेआ जे कर्मयोगी सप्ताह दा विचार प्रधानमंत्री नरेंद्र मोदी हुंदा ऐ। उनें आखेआ जे सिक्खने दी प्रक्रिया लगातारी चलदी रौहनी लोड़चदी ऐ। समर्थ निर्माण सरबंधी आयोग दे अध्यक्ष, आदिल जैनुलभाई होरें गलाया ऐ जे आई-गॉट प्लेटफॉर्म पर वेबिनार ते कार्यशालाएं दे माध्यम कन्नै कर्मचारियें पूरी उम्र नमियां चीजां सिक्खने दी वचनबद्धता गी अपनाया ऐ। देशै दे सब्बनें सरकारी कर्मचारियें पिच्छले म्हीने दी 19 थमां 27 तरीक तगर इक हफ्ते लेई, कर्मयोगी सप्ताह दे राहें किट्ठे रलियै सिक्खने ते विकास दी इस शानदार जात्तरा च अपनी हिस्सेदारी जकीनी बनाई। अमले ते सिखलाई सरबंधी मैहकमे नै आखेआ ऐ जे एह इक ऐसा आंदोलन हा जिसनै सब्बनें मैहकमें दे लोक सेवकें

गी पेशेवर उत्कृष्टता ते व्यक्तिगत विकास दी उंदी सांझी खोज च होर नेडे आहन्नेआ ऐ। प्रधानमंत्री नरेन्द्र मोदी होरें 19 अक्टूबर गी नमीं दिल्ली च कर्मयोगी सप्ताह दा शुभारंभ कीता हा।

<><><><><><>

Bangladesh Muhammad Yunus

बांग्लादेश च नोबेल पुरस्कार विजेता मुहम्मद यूनूस हुंदे नेतृत्व आहली अंतरिम सरकार नै देशै च 90 फीसद मुस्लिम आबादी दा हवाला दिंदे होई देशै दे संविधान थमां 'धर्मनिरपेक्षता' लफज गी हटाने पर बल दित्ता ऐ। उच्च अदालतै च 15में संविधान संशोधन दी वैधता पर सुनवाई दे दरान कल बांग्लादेश दे अटॉर्नी जनरल मोहम्मद असदुज्जमां होरें आखेआ जे धर्मनिरपेक्षता, बांग्लादेश च 90 फीसद मुस्लिम आबादी दी असलियत गी नेई दस्सदी ऐ। अटॉर्नी जनरल नै समाजवाद, बंगाली राष्ट्रवाद ते बंगबंधु शेख मुजीबुर रहमान गी "राष्ट्रपिता" दे रूप च नामित करने आहले प्रावधानें गी हटाने दी बी गल्ल कीती। अटॉर्नी जनरल होरें बैहस दे दरान आखेआ जे बांग्लादेश दे मुक्ति संग्राम च शेख मुजीबुर रहमान हुंदे जोगदान गी नकारेया नेई जाई सकदा, पर 15में संशोधन कन्नै इस उपाधि गी लागू करना, संविधान गी ओह्दी मूल भावना थमां दूर करदा ऐ। एह्दे अलावा बंगाली राष्ट्रवाद पर अटॉर्नी जनरल नै भाशा दे राहें राष्ट्री पन्छान दी निंदेआ कीती। अटॉर्नी जनरल नै कार्यवाहक सरकार दी बवस्था गी खत्म करने दा बरोध कीता। साबका प्रधानमंत्री शेख हसीना हुंदे नेतृत्व आहली सरकारै 2011 च 15में संविधान संशोधन राहें कार्यवाहक सरकार प्रणाली गी खत्म करी दित्ता हा ते इस संशोधन दा बांग्लादेश नेशनलिस्ट पार्टी ते होरनें दलें बरोध कीता हा।

<><><><><><>

Imran Khan

पाकिस्तान दी इक अदालतै तोशाखाना कन्नै सरबंधत दुए मामले च पाकिस्तान दे साबका प्रधानमंत्री इमरान खान ते उंदी घरै आहली बुशारा बीबी गी बरी करने दी उंदी गुजारिश गी अज्ज खारिज करी दित्ता। सेंट्रल इस्लामाबाद दे विशेष न्याऽधीश नै सुनवाई दरान उंदी गुजारिश गी खारज करदे होई आखेआ जे उंदे खलाफ अगले हफ्ते संगारें औपचारिक तौर पर आरोप तय कीते जाडन। इमरान ते उंदी घरै आहली पर सत्ता च रौहदे होई सरकारी नियमें दी उल्लंघना करियै सरकारी तोहफें गी अपने कोल रक्खने ते बेचने दा आरोप ऐ। हालांकि, उंदी पार्टी पाकिस्तान तहरीक-ए-इंसाफ नै इनें सब्बने आरोपें थमां इन्कार करदे होई आखेआ ऐ जे उनें कोई बी गलत कम्म नेई कीता ऐ।

<><><><><><>